



Conférence des Évêques de Madagascar

SECRETARIAT DE COORDINATION

102 bis, rue Cardinal Jérôme Rakotomalala

BP. 667

Antanimena Antananarivo – 101

Fanentanana avy amin'ny Fivondronamben'ny Eveka momba ny famangian'i Papa Fransoa an'i Madagasikara

" Hataoko ao anatinareo ny Fanahiko.... Honina eo amin'ny tany nomeko ny razanareo ianareo, dia ho vahoakako ianareo, ary izaho ho Andriamanitrareo" (Ez 36, 27-28)

Homba antsika mianakavy anie ny fiadanana!

- Misaotra an'Andriamanitra isika fa tanteraka ny faniriansika sy ny an'ny Papa Fransoa, hamangy an'i Madagasikara ny 6 -10 septambra 2019, ho avy izao. Fitia mifamaly mahatsara fihavanana.
- Famangiana pastoraly miavaka izany amin'ny maha filohan'ny Eglizy maneran-tany azy : hamafy fanantenana sy fiadanana ho antsika eto Madagasikara.
- Manantanteraka ny fanamby apetrany ho an'izao tontolo izao izy : mandeha manatona ny vahoaka (sortie). Mankahery ny mahantra sy mizara ny hafalian'ny Evanjely.
- Koa manentana antsika rehetra àry hivavaka sy hahay handray ireo toromarika rehetra, indrindra fa ireo izay omen'ny vaomieran'ny fandalinam-pinoana sy ny katesizy, ho fanomanana ara-panahy ity fahatongavan'ny Papa Fransoa ity.

HAMAFY FANANTENANA SY FIADANANA

Hararaotintsika izao fahasovana omen'Andriamanitra antsika izao hanarenantsika miaraka ireto lesoka ireto :

- Na mameno trano fiangonana aza ny kristianina dia tsapa fa tsy mbola mafy orina ny finoana ka mihena ny fandraisana sakramenta. Tsy tafita ny fandalinam-pinoana.
- Ny fiaraha-monina mikorontana, samy mitady ny ho azy, ny fiainana lafo vidy, ny kolikoly lasa fomba amam-panao, ny fitsarana lasa gaboraraka, tafahoatra ny vono olona etsy sy eroa; tsy mbola mandry fahalemana ny tany na dia eo aza ny ezaka lehibe iarahan'ny mpitandro filaminana sy ny vahoaka. Misara-bazana ny fianakaviana.
- Ireo tanora tsy mahita modely tsara hotahafina ka mora voasariky ny rendrarendra samihafa, mivarilavo amin'ny zava-mahadomelina, tsy manaja ny soatoavina, tsy mahafola-tena hilofo hiasa ka « mitady tany malemy hanorenam-pangady ».
- Lasa toa fahazarana ny manao fampanantenana poak'aty sy ny fanaovana politika mampisara-bazana ny mpiray tanindrazana indraindray, ary ny fomba fiasa koa

matetika toa tsy ahatsapana ny tena fitiavan-tanindrazana marina... fahazaran-dratsy manangona ny ho an'ny tena no hita fa tsy mitsinjo ny soa iombonana

- Mibaribary ny fahasimban'ny soatoavina sy ny hasina maha-olona ary indrindra ny "Tranobe iombonana" eto Madagasikara.

➤ **Ho tonga hamafy fanantenana ny Papa Ray Masina :**

- Handray sokajin'olona maro samihafa Izy : Filoham-pirenena sy mpitondra fanjakana, fiaraha-monim-pirenena sy ny masoivoho vahiny, Eveka, Pretra, Relijiozy, Seminarista, Skolastika sy Novisy... Filoham-piangonana ao amin'ny FFKM sy mpitondra fivavahana ary ireo tsara sitra-po rehetra
- Hankahery ireo tanoran'i Madagasikara izy sy ireo fianakaviana eny amin'ny Akamasoa (Père Pedro).
- Fa indrindra, hankalaza Sorona Masina lehibe hiombonan'ny Malagasy rehetra eny Soamandrakizay - Androhibe.

➤ **Ho tonga hamafy fiadanana ny Papa Ray Masina :**

- Amin'ny maha PAPA FRANSOA AZY : Mpiandry ondry mahatoky izy, mamangy firenena maneran-tany; tsy mitsaha-manoratra sy mampianatra mba hampitombo finoana ny olona sy hampirindra ny fiainan'ny Eglizy. Araka ny voalazan'i Jesoa hoe : « Ho aminareo anie ny FIADANANA » (Jn 20,19).
- Ho antsika eto Madagasikara : Hamafy fiadanana izy amin'ny alalan'ny vavaka sy ny fampianarany, izay inoana fa hampiombona antsika Malagasy rehetra, na katolika na tsy katolika, na mpino na tsy mpino, na ambanivohitra na an-tanandehibe...
- Hanamafy orina ny fihavanana izy ka hampirisika antsika hifandray tånana mba ho afaka handrava ny elanelana misy amin'ny farim-piainana andavanandro.
- Ary haneho amintsika rehetra koa fa ny EGLIZY dia « Fahazavan' izao Tontolo izao » ao amin'i KRISTY izay MAMONDRONA NY SOATOAVINA REHETRA. (jer. Ef 1, 10)

"Manentana anareo aho hampijoro firaisan-kina, tsy misy fitiavan-tena, ary hiverina amin'ny fiharian-karena sy ny fitantanam-bola miompana amin'ny fitsipi-piainana ara-môraly mitandro ny hasina maha olona.", hoy ny Papa Fransoa. (Hafalian'ny Evanjely n°58)

Entintsika am-bavaka ary ny Papa Fransoa mba ho salama lalandava ka ho tonga soa aman-tsara eto anivontsika. Ankinintsika amin'i Masina Maria sy ireo Olomasina ary ireo Olontsambatra rehetra niaina teto Madagasikara ity famangiana miavaka ity.

Mitso-drano anareo rehetra,

Ny Fivondronamben'ny Eveka eto Madagasikara
Ny Filoha : Son Eminence le Cardinal TSARAHAZANA Désiré

Natao teto Antananarivo
Anio 14 mai 2019
Fankalazana an'i Md Matiasy, Apostoly.